



Arzgebirgische Gedichte zer Adventszeit

1. Dezember Unnre Manneln

Bal is wieder mol su weit, es kimmt de liebe Weihnachtszeit. Drim steign mr heit ofn Buden nauf un wecken unnre Manneln auf. He, Bargma, Engel, Raacherma, du, Nussknacker bist aah miet dra. Ihr habt genug geschlofen nu, itze is aus mit eirer Ruh. Mir alle fräe uns doch aah, dass mr eich endlich wiedersah. Mei Bargma kimmt ans Fanster hie, weil er do alle Gahr will stieh.





Dr Engel von dr Großmama Im neien Kläd stieht aah miet dra. Dr Nussknacker in ruter Gack hot nahm dr Peremett sein Flack. Nu fahlt bluß noch dr Raacherma. Dan stelln mr glei nahm Christbam na un stecken ne, dos muss doch sei,

aah fix e Raacherkerzel nei, damit er tüchtig qualme ka, dä dos gefällt en Raacherma. Ach, wie is dos doch wieder schie! Gern guckt mr zu dan Manneln hie. Nu kommt, ihr Gunge, un ihr Mäd. Ihr habt ja doch de gräßte Fräd. Aber aah ihr Grußen seid bereit un frät eich of de Weihnachtszeit.



Margarete Junghans

2. Dezember Dr Nussknacker

Eich allen bi ich gut bekannt. "Dr Nußknacker", war ich genannt. Im Arzgebirg bi ich derham do is fei schie, dös könnt ihr glam. Doch kennt mr mich, ich kanns eich sa, sugar in Amerika.

Aus Holz gedreht, su stieh ich hier, un alle hom ihr Fräd an mir. Guck ich eich ah racht grimmig a, su bi ich doch e fleißger Ma, dä ich knack schu seit alter Zeit für eich de Nüss, ihr lieben Leit.

Zer Weihnachtszeit beim Kerzenschei stell ich mich alle Gahr miet ei. Sei dann de Lichter ahgezünd, es erste Weihnachtslied erklingt, wenn de klenn Gunge und de Mad ofn Rupprich warten voller Frad, de Leit wolln in de Metten gieh – ach, wie is dos dann wieder schie!

Drim wünsch ich eich, ihr lieben Leit, e rachte, schiene Weihnachtszeit, un haltet nu noch aller Plog gesunde, frohe Feiertog.



Is Raachermannl

Als Racherma kennt miech jeder iech blos ne Raach racht weit feder, waar iech ze Weihnacht aufgetrogn, do tu iech raachn un net viel sogn.

Meitog hob iech eich Fraad gebracht hob in dr Stub viel Damp gemacht, de Schwoden steign dr Deck ubn na, du guter, alter Raacherma.

In unnern Stübl is racht schie do bleib iech noch e bissl stieh, su warsch schie immer, su wards sei, is Raachermannl mittennei.



Dr Engel

Mir hobn an unnern Fanster enn Lichterengel stieh, ar hot e rachtes Alter un sieht nimeh su schie.

Sei Kläd is bill verblichn, es Nasel hot en Schmiss, ar hot sich dra gestußn, wie dos im Labn aah is.

Un is aah unner Engel ball hunnert Gahr nu alt, sei Licht scheint hall wie immer naus in de Winterwalt.

Tutt Fried un Fräd verkündn ged`s Gahr zer Weihnachtszeit, lässt zuenannder finden de klän un grußen Leit.



Dorotea Uhlmann



Im Dezember

Frät eich, mir sei nu im Advent, do gieht de Finsternis ze End. E Lichtel is schu agebrannt, mocht wieder hall is Haamitland.

lech fang nu aah zu kramern a. De Schwod vun unnern Raacherma zieht sacht in Stübel har un hie. Wie gerne iech da hinne bie!





Do sei de Manneln aufgestellt, un ze de Bargleit, do gesellt mei alter Engel sich derzu. lech guck ne a, un bie racht fruh.

Is ganze liebe lange Labn hot dar mir Weihnachtsfrieden gabn.

Wie immer aah de Zeiten sei – ar brengt ne alle Gahr of s nei.

Dorothea Uhlmann

Mer muss drwarten könne

Wieder is e Gahr vergange un de Weihnachtszeit kimmt ra, älles fraat sich schie of's Fast, gleich äb Kind, äb Fraa un Maa. Überol gibt's Haamlichkaaten, es wärd getuschelt – un versteckt, dass ja niemand de Geschenke noch vür'n Heilign-Obnd entdeckt.





Manche kenne`s net drwarten, suchen do, un suchen dort. Doch für die – wenn se wos finden – is de Fraad fei werklich fort.

Drum lässt eich von mir heit roten, 's is doch 's schinnste miet in Labn, wenn 's zu Stolln un Weihnochtsbroten, 's tut 'ne Überraschung gabn. Willn mer warten bis dr Rupperich kloppt an unnerer Tür miet a. Brengt er gar – wos lang ersehnt wur, is er doch dr beste Ma.



Angela Thiel

Dr Leichter



Su lang iech mich derinnern ka, hot`s aah dan Leichter gabn. Ar stieht geds Gahr zer Weihnachtszeit ben Raacherma dernabn.

> Ar wor mol när e Stickel Hulz, un käner wäß, wie alt. Dos hot dr Voter mitgebrucht aus unnern Haamitwald.

Ar hot dan Leichter draus gemocht, su huch, un su schie rund. Derbei hobn mir ne zugeguckt in trauter Dammerstund.

Dr Voter is schun lang ni meh, dos is abn su, im Labn. Sei Leichter ober, dar stieht do, ben Raacherma dernabn.



Dorothea Uhlmann





Es ward net lang dauern, do fängts a ze schnei!
Mir huln e wing Reisig un Zappen rei.
Mir schmücken de Stub mit viel Tannegrü,
dä de Vürweihnachtszeit, die is doch su schie.

Dr Bargma, dar hot schu sei Licht aufgesteckt, dernabn sich dr neie Nussknacker reckt. De Peremett hobn mir toglang schu gieh, dä de Vürweihnachtszeit, die is doch su schie.

Obnd sitzen mer zam, s wird gestrickt un genäht.

De klaane Maad braucht für de Pupp e Kläd.

Do ka mer vür elfe ze Bett net gieh.

De Vürweihnachtszeit strengt a, aber is schie!





Regine Seifert

9. Dezember Wenn ...

Wenn dr Schneesturm durch de Falder wie dr wilder Gaager braust, daar un gener in de Walder sich enn rachten Lichterbaam maust. wenn dr Lehrer mit de Kinner singt dos Lied vun Tannebaam. un de Kinner of dr Zschinner gieh un kumme när ehaam. Wenn dr Voter un de Mutter überrachne mol ihr Gald. un zun Backen när de Butter un noch su e mannichs faahlt. wenn de Weihraachkarzle duften. un dr Bargma werd geleimt, wenn se alle müssen schuften, wall de Eck werd eigeraimt, wenn de Mutter mit n Hader fix durch alle Stöbn läft un de Kinner un ne Voter ball in Wasserdrahsch dersäft. wenn de Kinner obnd halb neine pünktlich waarn nei's Bett gebracht, wenn dr Rupprich tut erscheine un dr Kuhhos werd geschlacht, wenn de Peremett tut laafen. wenn Musikprob in dr Kirch, un mer tut enn Haufen kaafen dann is Weihnacht im Gebirg.



Max Wenzel

Hutzenobnd

Zum Hutzenobnd lod iech heit ei, kummt in de gute Stub miet rei, seit alter Zeit is`s bei uns su – erscht of dr Ufenbank, do sei mr fruh; mr habn uns meitog ofs Hutzen gefrat, drim stinne aah wieder viel Stühl parat; bestimmt kimmt dr Franz mit seiner Fried, die brenge is Schnitz- un is Klippelzeig miet, über dies un gäns ward heit gequatscht, aah über manche Leit gelatscht – när Gutes – des versicher iech, kennt mor`sch glaabn, des is kaa Lüg; gekost waarn heit Plätzle aus Zucker un Zimt, nu wart mr o, waar noch allis kimmt ... ?!





När zen Agucken

Ze Weihnachten möchte aah e Nußknacker sei. Wos sog iech? När aaner? Bei mir sei`s gelei vier Dingrichn, die stinne in Reih un Glied un machen als Wachter de Weihnachtszeit miet. Die dechten sich frei, un die traten eich do un gucken barbeißig von Schrank ze uns ro.

Dar aane is König, dar annre sugar e terkischer Sultan, der dritte Husar, der vierte Schandarm aus der kaiserlichn Zeit. Wie bies dar enn aguckt: "lech fraß eich, ihr Leit!" Un allezamm reißen ihr Maul se weit auf. Warüm? Nu, die Prügeln, die warten bluß drauf, doß aaner ne bal mol ze knacken wos gibt un zwischen de Zäh ene Nuß mol neischiebt.

Dodrauf ober könne se warten wie lang! Dä doderfür sei die net do, kaa Gedank! Fer suwos is fer dan, dar su enn Kerl hot, die Galdausgob ober nu werklich ze schod. Zen Agucken namlich när stellt mer sche hie, un Nußknacker – sanne die epper net schie?



Manfred Pollmer

Zer Weihnachtszeit!



Zer Weihnachtszeit, zer Weihnachtszeit, Wenn's draußn racht sehr stürmt un schneit, Setz ich mich of de Ufnbank, Do ward mr a de Zeit net lang, Un spiel Gitarr'un sing drzu, Dos macht zefrieden mich un fruh.

Drauf brenn` ich mir e Pfeifl a, Nu kimmt mei Mandeline dra; Gar manches traute Weihnachtslied Erhalt mr`s Harzl un`s Gemüt. O Weihnachtszeit, o sal`ge Zeit, Du brengst ne Menschen Fried un Freid.

Bal Zitherspiel un Geignspiel – Klingt lieblich in dr Abendstill. Kaa Sorg zieht durch mei Stübl klaa, Weil die verscheicht Frau Musika. Gesang, Musik, dos is mei Labn, Fer mich ka`s halt nischt Schennres gabn.



Kurt Prager



Unner guter Stollen

Zum Arzgebirg soogt mer aa Weihnachtsland, do denkt mer an Nußknacker glei, doch is aa wos annersch noch sehr bekannt, bei uns gibbts e herrliche Leckerei.

Rosining, viel Manneln und Zitronat, des alles und Millich drzu, aa Salz gehärt nei, denn sinst schmeckt`r fad, dann muß`r noch gieh und braucht ball zwee Stund Ruh.

Kimmt dann ausn Ufen die Köstlichkeit, dar Duft, des is gar net ze sogn. Erscht Butter, dann Zucker noch drübergestreit, mit Kaffee, do kaa mer schu zah Stück vertrogn.-

Stolln, Stolln, Stolln muß sei, in der Weihnachtsbäckerei, Leit, aßt mit, guten Appetit!
Leit, aßt mit, guten Appetit!



Martina Gutzeit

Advent im Arzgebirg



Es ist, als wärd e Schalter imgelegt, wos sich im Advent, bei uns im Gebirg, alles su regt. In de Fanster hall de Lichtle blitzen, in de Laaden sieht mor ne Hans-Rupprich sitzen. Dor Vater kimmt aus dor Werkstatt kaum raus, de Mutter putzt un flimmert im ganzen Haus. Im Radio warn schu de Weihnachtslieder gesunge un of ne Heiligohmd frahe sich de Maad un de Gunge.

Wenn überall Schnee im Gebirg dann liecht, es hier un do noch Raacherkarzle riecht, es gieht langsam of Weihnachten zu, un de Hektik macht Platz für Besinnung un Ruh. Beim Bäck riechts nooch Pfafferkuchn un Stolln. Is Mannlezeig tut mor von Buden ro huln. De Weihnachtsgeschenke warn besorgt, wenn's Gald net reicht, dann ward aahm geborgt. Muus un Reisig warn aus ne Wald gehult, en neue Schnauzer gibt's fürn Raachermaa, wal dor alte verkuhlt.

In dor Natur un ins Herz zieht Frieden ei, dos is Advent im Gebirg, un su solls aah sei.



Hermann Trültzsch


Dr klaane Ruschler

Rute Nos un rute Ohrn – unnerwaags ne Schal verlorn; guckt när hi, ihr guten Leit, härt när, wie`r "Bahne!" schreit.





Unten kriegt`r net`n Dreh, un er fliegt in Bugn nei`n Schnee: sieht`r wie e Schneema aus, doch er macht sich gar nisch draus!





Heinz Lauckner

Unner Schneema

Kommt, halft feste miet, ihr Leit. Mr baue mol en Schneema heit. Wälzt aus Schnee e dicke Roll. weil dos doch dr Bauch sei soll. E klännre Kugel dann zuletzt werd als Kopp umdraufgesetzt. Sei Aang, die machen mr aus Kuhln, die mr ausn Kaller huln. Schwarze Knöpp, e ganze Reih drücken mr vorn in Bauch nu nei. Wie sich jedes doch när bemüht. bis su e Schneema endlich stieht! Wie se alle schwitzen tu un sich plogn fei immerzu! Hult nu Opas alten Hut, dar stieht gewiss en Schneema gut. En Basen von dr Großmama stelln mr an dr Seit noch na. Ihr Leit, guckt när mol richtig hie, sieht dar Kerl dä net racht schie! Mit seiner grußen Mähr als Nos guckt er munter nei zer Stroß. Un weil er uns su gut gefällt, do hoff mr. dass er sich lang hält.



Margarete Junghans

Weihnachten

Sitz mar wieder alle zamm in dr Weihnachtszeit, wenn de Lichter strahln am Baam, singe alle Leit.



Singe ihre alten Lieder in dr heilgen Nacht, giehn zer Kirch un komme wieder, in de Weihnachtspracht.



Doch wos nützen uns Geschenke, Stolln un Pfafferkuchn, wenn mr net im heilgen Feste unnern Frieden suchn.

Jo, mr wolln zen Weihnachtsfest Wieder nei ohfange, un uns in dan nächsten Gohr alle frei vertragn.



Helmut Liebscher

Dos aane Licht



Wenn in Gebirg, bei uns do ubn, dr Naabel dickste Schwoodn waabt. un wenn de Kält uns, voller Blum aus Eis, de Fanster überklabt. wenn dr Sturm de Baam zerschüttelt un de Fichtengippel zaust, un an Tür un Loodn rüttelt, un üm Haus un Gartn braust: wenns schu üm dreie finster werd un de Luft voll Krahgeschrei, sist mer gar kaan Vugel härt, kahs an oft racht drücknd sei. Wie machst do su leicht un fruh. daß Advents- un Weihnachtskerzen nei ins Dunkle lächten tu, un dermiet alln Menschenharzen werd dos anne Licht verkündt. dos mer in aan Krippel findt.



Raachermannl



Raachermannl, klaanes Ding, iech verstieh diech gut:
Mit daar Hetz un dan Gewürch hot's bei dir kaa Nut.

Du sogst uns gemietlich fruh: "Setz eich doch mol hie -, gennt eich aa a bissel Ruh, macht's adventlich schie!"

"Zindt a Raacherkerzl aa, schnuppert, fraat eich, kummt, löscht dos halle Licht mol aus, macht a Kerzelstund`!"

Ja, du klaaner Raachermaa, iech muß racht dir gaabn:
Uhne Ruh un uhne Fraad hoot mer nischt vun Laabn.



Dr Weihnachtsfriede



De Weihnacht kimmt nu wieder, mer sei schu im Advent, un es erklinge Lieder, die wuhl e jeder kennt.

Drham in unnern Stübel, do is so haamlich traut, de Manneln hobn mer wieder, wie jed`s Gahr, aufgebaut.

Un wenn de Lichter brenn, kimmt Fraad in unner Herz, do legt dr Weihnachtsfriede siech aah auf Leid un Schmerz.



Wilfried Hammermüller

Horcht! Horcht!

Horcht! Horcht!
Se blosen Weihnachten ei!
Of`n Turm fängt`s Blosen a,
se spieln e Weichnachtslied.
Mir traten z`samm zen Fanster na,
mei Vater, der spielt miet.
Su blosen se Weihnachten ei,
der Heilge Obnd is do.
Ins Herz fällt do e Sternel nei,
dos kimmt vom Himmel ro.
Horcht! Horcht!







Se blosen Weihnachten ei!

Horcht! Horcht!
Se singe Weihnachten ei!
Nu fängt es Singe a.
Wie schie horcht sich`s do zu!
Un wos mer net verstihe ka,
dos waß mer aah esu.
Su singe se Weihnachten ei,
der Heilge Obnd is do.
Ins Herz fällt do e Sternel nei,
dos kimmt vom Himmel ro.
Horcht! Horcht!
Se singe Weihnachten ei!

Karl Hans Pollmer

Dr Winter hot siech eigestellt

Dr Winter hot siech eigestellt mit Schnee un Eis un bittrer Kält, de Fanster sei gefrorn.

Ne Sturmwind ka mr pfeifn härn, im Viere will`s lang finstr warn, kahl sei de Baamr worn.

Doch `s lechtn nu aus gedn Haus viel klaane, halle Lichtle raus, denn `s is ja Weihnachtszeit.
Un is de Nacht aah noch su kalt, die Lichtle machen warm de Walt, un alle Harzn weit.

Dar Lichtrglanz im Wintrschnee, dar sogt uns obr aah noch meh, will zu bedenkn gaabn, doss überol sell Friedn sei in allr Walt, togaus, togei! Dofür luhnt sich`s ze laabn.



Dor Rupperich



Ihr kennt doch ollsamt "off Noten un Strich"
dan ollen guten Hans-Rupperich
im lange weißen Bart. Un in Pelz hot er a,
in Sack offn Buckel, un ä Besen hängt dra!
Su zieht dor Kerl von Haus ze Haus
un horcht do de Leit un de Kinner aus.
Dos äne muss beten, dos annere singen;
un wills monchmol net su gelingen,
dann hilft dor gute Hans-Rupprich miet.
De Hauptsach is, doss er in Sack runnerzieht.
Aus dem brängt er dann de schensten Sachen,
die den Kinnern de gräßte Fraad im Labn machen:
Äppeln un Nüss un ä Pfaar mit Wogn.
Er ka `s kaum ertrog`n.

Kurzim: Mer ka bei ihm ollis kriegn, mor muss när gut folgen un drauf net lügn! Sunst nimmt er dan Besen, zieht straff de Hus un zählt, - ober net bis zehne bluß! Er haut sulang drauf, bis dor Voter tut sogn: "Itze wärd er schu folg`n, här auf nu mit Schloh`n!"







Ernst Beier



Dr Christbaam mocht is Stübel hall, de Peremett dreht sich sacht. De Spieldus spielt e alte Weis. Un vorne haußen glitzert`s weiß – wos dos fer Fräd uns macht!

Dr Raacherma dampt in dr Stub gemütlich vür sich hie. De Kinner tebsen rim im Haus, probiern is neie Spielzeig aus. Wie is dar Obnd su schie!

Erscht lange nooch dr Mitternacht richt` mer de Betten har.

De Kinner schlofen selig ei.
Fer unnern Bargma is verbei de schennste Schicht im Gahr.



Dorothea Uhlmann

Liebe Bewohner, Patienten, Tagespflegegäste, Mieter und Freunde des Gut Förstels,

ich hoffe, dass Sie viel Freude mit unseren Gedichten zur Adventszeit hatten und die Weihnachtstage gut mit Ihren Angehörigen verbracht haben.



Das Jahr 2015 neigt sich nun seinem Ende zu. Ein Jahr mit Höhen und Tiefen, mit Tagen der Freude, vielleicht auch mit Tagen der Traurigkeit.

Was wird uns das neue Jahr wohl bringen? Eine Frage, die keiner von uns beantworten kann. Eine Tatsache, die aber vielleicht auch gut ist. Unser Bestreben ist es auch im kommenden Jahr, das Sie eine gute Zeit in unseren Einrichtungen verbringen können und das wir durch unsere Dienstleistungen einen Beitrag leisten können, um Ihr Leben etwas einfacher und dadurch auch besser zu machen.

"Dem Menschen verpflichtet" ist ein Leitsatz, der seit Gründung der Dr. Willmar Schwabeschen Heimstättenstiftung im Jahre 1904 Bestand hat und

der uns antreibt zu lernen, zuzuhören und für Sie da zu sein.

Das offene Ohr biete ich Ihnen auch im

neuen Jahr an. Scheuen Sie sich nicht, mich im Bedarfsfall anzusprechen.

"Porta patet cor magis - Die Tür steht offen, umso mehr das Herz."

Ihnen und denen die Ihnen nahe sind wünsche ich einen guten Start in das neue Jahr, alles erdenklich Gute und vor allem Gesundheit.

"Glück Auf" Ihr

Michael Eisenberg
Geschäftsführende Hausleitung



Wir wünschen Ihnen, liebe Leserinnen und Leser, eine schöne und friedvolle Adventsund Weihnachtszeit sowie alles erdenklich Gute für das neue Jahr 2016.



Quellen: Erzgebirgisches Weihnachtsbüchlein 1994 – 2013

Erzgebirgische Heimatblätter 1994

Behüt eich fei dos Licht - Ein Weihnachtsbuch des

Erzgbirges

Unner ganze Haamit is e

Weihnachtslied - Karl- Heinz Schmidt

www.google.de

